



DEO OPTIMO MAX.
UNI ET TRINO.

VIRGINI DEIPARÆ, ET S. LUCE
Orthodoxorum Medicorum Patrono.



QUÆSTIO MEDICA,

QUODLIBETARIIS DISPUTATIONIBUS
manè discutienda, in Scholis Medicorum, die Jovis vigesima-sexta
Januarii, anni M. DCC. XXXVI.

M. ADRIANO MALAVAL,
Doctore Medico, Præsidente.

An Apoplexiæ Prægnantium Saphenæ sectio?

I.



EMBRYO rerum *non-naturalium* quasi septima, cui per novem menses, Mulier Utero gerens objicitur. Minus Matri connexus, quàm appensus, eandem sæpius afficit, ab eâdem afficitur rariùs. Sux illi sunt functiones, quarum causa & ortus à Matre vix pendet: aliqua tamen est inter utrumque convenientia: Mater Fœtui dat alimoniam materiem, vel potius apponit, Fe-

A

tus succo nutricao quem admittit, conciliat formam. Liquida Matris in Placentam leniter appellant; ad eandem liquida Fetus moliter redeunt; Placenta ideo est media *elateris* in Fetu & Matre distincti meta. Pragnans diu vivere non posset, si Infans humorum ad se venientium quantitatem non regeret; Infans pariter nec evolvi, nec crescere posset, si tenella sua stamina liquidorum vim experirentur. Ubi vel copia, vel motu, vel substantia, humor à Matre proveniens vim Embryonis *elasticam* superat, tunc dehiscunt, aut rumpuntur vascula Placentæ, timorque est ne perdat Fetus. Ubi à partu remanent Secundinæ, tolliturque Embryonis, ex rupto Umbilici funiculo, in uterina vasa nifus; tunc uberior effluit sanguis, nunquam sistendus, nisi deciduis, aut amotis Secundinis, timorque est ne percat Mater. Vim Fetus *elasticam* demonstrat sanguinis circuitus alias ac in Matre agnoscens leges, planèque diversus ratione directionis & impetus. Si ægrotet in sinu Matris Infans, propria suâ vi semetipsum per Uteri vias sanat; huc sibi superfluum amandat pondus, aliquando assumendum; nihil proinde ad tempus à Matre accipiens, in eâ ægritudines excitat eò difficiliore, quòd occupat Uteri viam, quâ vacuâ, quælibet ægrotans sæpe purgatur criticè. Cuicumque à graviditate morbo ineunti adest tantummodo duplex causa; prima, scilicet Embryo; altera, succus circa Uterum impeditus, cespitans, & idcirco ad alias partes refluens. Non sèvit illicò quæ dicitur causa continens; adhuc enim resistit in hisce morbis fibrarum *elater*. Sic in Apoplexiâ Prægnantium, sola peccat nervorum compressio, vasorumque intumescencia. Apoplexiæ vulgari similis est, motus & sensus repentinâ læsione; sed Cerebri integritate ab eadem discrepat; merè Hystericarum affectionum servans indolem, singulariter suadet Saphe-næ sectionem.

I I.

CAUSARUM indagatio primum est Medici officium. Illarum omnes debellare nec debet, nec potest, nec satagit. Dignoscere tenetur & dijudicare quælibet. Distinguit igitur alias quocunque remedio fortiores, alias marte proprio delendas, alias soli cedentes medelæ: atque in remediorum usu, species sèligit, captat tempora, solutiones observat. A variis causis nec videt, nec exspectat semper diversos morbos: in diversis morbis non semper

diversas suspicatur causas ; & ob id præcipue artis suæ miratur mysteria. In Prægnante ingruit raro quæ dicitur fortis Apoplexia , sive insanabilis ; quia intima fibrarum nervosarum in Cerebro vel rigiditas, vel laxitas, raro in Gravidis accedit. Imò, quæ in Viris fauste curantur Apoplexiæ, plerumque debiles sunt, & merè Hypochondriacæ. Ubi in Utero satis est *elateris* ad Fetum suscipiendum & continendum, ibi multò magis adest in Cerebro, ejus membranis, nervisque, sufficiens tonus, ad avertendum idiopathicæ Apoplexiæ impetum. Uteri enim ceterarumque partium *elasticitatem* Cerebrum singulariter moderatur. Hinc verum Hippocratis axiomata : * *Apoplexiam fortem solvere impossibile est, debilem verò non facile.* Illa Cerebrum & nervos ab eodem primitus ortos declarat penitus pessundatos : hæc nervos Sympathicos, à coalescentibus Pari Vago & *Intercostali* proficiscentes, monet impeditos. Merè debilis judicanda est Apoplexia Prægnantium. In eâ integri sunt quicunque nervi ; sola læditur eorum superficies. Oritur ex eo quod succi ad Embryonem destinati 1. suspendantur. 2. ad vasa sanguinea resiliant. 3. eadem distendant. 4. nervi premantur Sympathici. 5. ex consensu, nervi Primarii pari modo afficiantur. 6. in quibilibet solidis partibus occultè, in Corde verò & Arteriis apertè langueant diastole & systole. 7. mentis & corporis pervertatur æquilibras. Cessant brevi ista symptomata Saphenæ sectione, quæ recens circa Uterum solius sanguinis redundantia haud cunctanter aufertur.

* Aphor. II.
42.

I I I.

AP O P L E X I A Prægnantium à vulgari differt 1. ratione cause, quæ est antecedens, & ægrè fit continens, nisi morbus iste per aliquot dies invaluerit, vel pluries recruduerit, Mulierve affectibus Hystericis aliis & minoribus fuerit obnoxia. In Apoplexiâ à Cerebro ortâ viget causa continens, deficit aut vacat altera quæ dicitur antecedens, duplicique modo ; nempe vel sopita intus & ferians, vel præterita suisque tantum præsentibus cognita effectibus. 2. Differt ratione fibrarum nervosarum. Harum *elater* in Apoplexiâ Prægnantium vincit plerumque causam antecedentem, quæ præsens est ; in Apoplexiâ à Cerebro profecta, ipsemet *elater*, antecedentis cause, sive præsens sit sive absens, impetu proferuntur. Illius symptomata non fluunt à causâ nervis adhærente, sed à causâ quæ ex Utero ad Cerebrum nervosque extrinsecus propa-

gatur. Utriusque discrimina facile discernit Medicus. Uterinæ signa sunt : imperfecta palpebrarum conniventia , oculorum nulla torvitas , aliqua visus obscuratio , minor auditus læsio , oris nullus nec pituita nec vomitione mador , frequens oscitatio , flexuosa artuum pandiculatio , pulsus piger , inanis , in universo corpore absentia rigoris sive Tetani idiopathica Apoplexia vulgò comitis , sibili & stertoris immunitas. Ille signorum concursus evincit Apoplexiæ causam esse mobilem : arguit item simplex sanguinis circa Uterum pondus, & ad alias partes refluxum : unicè præterea innuit Saphenæ sectionem , quæ vasa Hypogastrica deplendo reserarat ; devium sanguinem per solitum iter , quâ proportionè uberius , eadem velocius ducit ; atque sola liquidum excedens præcisè subtrahendo , aliorum humorum dispares æquat circuitus.

I V.

SAPHENA sectâ , vas secatur parti laboranti proximum. Ut evacuatione menstrua præsentè , aut superveniente , sit nonnunquam supervacanea , quæ secus necessaria fuisset , Saphenæ sectio ; ita instantibus menstruis , vel deficientibus , eorum feliciter vices gerit. Quæ in Muliere non Prægnante quot-mensibus sit inutilis jactura , eadem (quantitate minor) sit & quotidie & utiliter in Prægnante. Fluxus uterque ab eodem fonte , lymphatico nempe constans succo. Naturâ tenax est , morâ magis lenescit , Uteri fibras onerat , vasa distendit majora , in quorum sinibus parit obstructions , quas sequitur in capillamentis erethismus. Sic duplici obicum genere, Fetus renixu pertinaciorum , partim lymphâ spissescit , partim sanguis in amplioribus turgēt vasis , & ad alia ascendendo refluit , nervos proinde Sympathicos comprimit , & longè facilius accersit Apoplexiam , si sit in Prægnante , ex parte temperiei , indigena humorum acrimonia ; ex parte indolis , vivida ad animi affectus propensio. Secta in pede vena reliquum sanguinem brevi vindicat à glutino , vasorum obstructions tollit , lymphaticorum erethismum delet , liberatque nervos. Dum enim una sanguinis portio liberius ad Tibiam appellit , eodem instanti altera facilius pervadit Uterum. Uno tenore deplentur truncus Iliacæ & venæ Hypogastricæ. Minora dein , sed paulo post , expediuntur vasa : varii ergo variorum humorum restituuntur itus & reditus. Quam tuta sit in Apoplexiâ Prægnantium Saphenæ sectio , sequens

comprobat observatio. Mulier *Gaston* dicta, in vico S. Martini Parisiis habitans, statim à serotino pastu, versùs sextum graviditatis mensem, passà est Apoplexiam. Huic, ut mos est, volatilia *cochleatim* nequicquam intrusa fuere; urinosi, quos vocant, spiritus ad nares densè & crebrò admoti; quassationibus, pugnis, vellicationibus, imò colaphis, ridiculè tunc (quod aliquando lethale est) per quatuor circiter horas agitata fuit. Tandem vocatus est Medicus, qui jam exarata observavit Apoplexiæ signa, & præterea artuum inferiorum frigus. Sanguinem è brachio detrahi postulabant adstantes; ejusdem è venâ pedis horrebant missionem, futuram ut pote, ex opinione suâ, funestam Fœtui. Censuit aliter Medicus; sui que conscius, coram se curavit faciendam Saphenæ sectionem, quam felicem sentiebat ex pulsu, eò liberiori, quò uberius effluebat sanguis; hanc unam adhibuit; rejecit quæcunque medicamenta; solum præscripsit aquæ tepentis per noctem usum. Horis vix octo elapsis, Prægnantem sanitati perfectè reddidit, Fœtu remanente sano, partûsque tempora expectante.

V,

CAVENDUM ab Emerico; saltem primo insilientis hujusce Apoplexiæ die. Humor peccans vasa capillaria non occupat; per eadem ergo adigendus non est. Nondum morbosè crudus aut coctus est; Purgatione proinde non indiget. Minuendus occurrit duntaxat sanguis. Exfulanda, quæ nuncupant, Volatilia remedia, eâdem ratione quâ prohibentur Purgantia & Vomitoria. Saphena vel pluries incisa sufficit, cujus efficaciam complet sola diluens diætâ. Secùs, Apoplexia evadit longa, lethalis, *convulsiva*; vel ipsam Abortus comitatur, vel tristia & immedicabilia nervorum excipiunt incommoda. Totum Medici opus, ad Apoplexiam Prægnantium sanandam, positum est in servando lacerissimarum partium nervosarum tono. Non emendanda sunt liquida: motio unicè compescenda. Diligenter observandum est, an solus in Utero verè turgeat sanguis, an nulla sit nimis evoluti liquidi corruptio, an nullum, præsertim in Pulmone & Hepate, impedimentum, an quodlibet Abdominis viscus sit inflammationis expers. Infantem nec præcipitat, nec occidit Saphenæ sectio, his cautionibus facta: Uteri enim majora tantum vasa aperit, minimis verò nullam vim infert: sic nihil, sive motûs, sive succi, invitus re-

cipit Fetus; sic perire, aut abortiri nequit. Quælibet venæ - sectio
 quæ sanguinem in aliquam partem derivat, motu suo ad aliquod
 tempus perseverante, robur addit ipsi; quo hæc eadem pars ad
 alias partes sanguinem uberius mittendo, ipsarum facillè vincit
elaterem. Eo sensu, venarum superiorum sectio menstrua promovet,
 partum ciet, abortum excitat. È contra, inferiorum venarum sectio
 in Virginibus; antequam sponte fluxerint menses, usurpata, tardat
 nimiam derivatione menstruum sanguinem, simulque Utero nifum
 dat, quo liquida sursum repelluntur: unde infarctâ organa vel
 insolitos & fugaces suscipiunt motus, quibus morbi nascuntur Hys-
 terici; vel ponderi humorum cedunt, morbique cumulantur
 Cachectici. Longè alios parit effectus Saphenæ sectio, à primo Apople-
 xix impetu, in Pregnantibus facta: evacuat ex Utero, sine ullo
 in ejusdem fibris roboris augmento: nulla tunc à Medico Naturæ
 motuum habetur ratio: solam arte suâ detrahendam meditatur
 exuberationem sanguinis, unicam istius Apoplexiæ causam, integris
 aliunde, quoad solidas partes, visceribus. Hanc etiam sanguinis
 redundantem sequitur aliquando fibrarum Uteri erethismus, ex
 quo alter morbus nascitur, descriptâ Apoplexiâ gravior. Est sci-
 licet atrox Convulsio, quæ, vel graviditatis tempore, vel immi-
 nente partu, vel post puerperium, omne corpus concutit. Uberri-
 mus tunc sanguis circa Uterum, & idcirco ab eodem magis de-
 flectens, sed adhuc spasmo negatam affectans viam, citissimam
 statim creberrimamque postulat Saphenæ sectionem, ut sequenti-
 bus constat observationibus. Mulier dicta *Desaigles*, manens Pari-
 siis viâ Templi, gaudens optimâ temperie, statim à partu, quoad
 Infantem felici, dirioribus & universis acta fuit Convulsionibus,
 lethargicâ mentis alienatione stipatis. Interim nullatenus appare-
 bant Lochia. Intra octodecim horas, ter sectâ Saphenâ, cessavere Con-
 vulsiones; Cerebro tamen semper gravato, maxillis spasmo rigen-
 tibus, oculis, auribus, linguâ stupefactis, impossibili denique ali-
 menti aut medicamenti liquidioris deglutitione. Ut istis, licet ex-
 tinctâ causâ, superstitibus adhuc symptomatis occurreretur, indi-
 cabatur eadem sanguinis detrahendi ratio. Solâ proinde mutatâ
 venâ, sex horis ab ultimâ Saphenæ sectione elapsis, è jugulo am-
 plè detractus fuit sanguis; & paulò post ægra (absentibus semper
 Lochiis, nec à Medico quæsitis, imò prorsus neglectis) mali prateriti
 ignara, ad se perfectè rediit. Altera Mulier dicta *Jacquemarre*,
 viâ S. Dionysii Parisiis habitans, septimestrem in Utero gerens

Fetum, Convulsionibus tristioris Epilepsiæ similibus Correpta fuit, cum eo linguæ tumore, quo extra os motu spontaneo propelleretur, dentibusque arietantibus adeò permoleretur, ut abscissionis esset periculum. Mortuum in Utero Infantem judicavit Medicus. Sancivit Obstetrici ne Matri admoveret manum: jussitque Fetum, quem conjecit solo Uteri motu exiturum, excipere molliter; Placentamque digitis, intactâ Uteri Vaginâ, leniter trahentibus educere. His ita præscriptis, missus fuit sanguis è Saphenâ; indeque fluxis tribus circiter horis, absque ullo Obstetricis adminiculo, mortuus Infans erupit cum Secundinis, solo detrusus spasmodum impetu. Quibus adhuc sævientibus, & identidem recrudescentibus, altera fuit adhibita Saphenæ sectio, quam, sex horis interpositis, tertia sequuta est. Postea, semotis quibuscunque adstantibus, solâ vigilante Ministrâ cubiculariâ, obscurato & pacato quantum fieri potuit loco, cautum fuit Ministræ, ut nihil de morbo narraret ægrotanti, prout spes erat, brevi loquutura, & cur lecto figeretur sciscitaturæ. Hæc si omittatur cautio, subitus morbi nunciati horror easdem sæpe renovat Convulsiones. Intra diem, sine Lochiorum evacuatione, perfectè convaluit ista Mulier. Quemadmodum igitur ortarum à recenti sanguinis circa Uterum plethorâ Convulsionum, ita à fortiori in Prægnantibus, nascentis ab eadem causâ, sub Apoplexiæ larvâ, Convulsionis, medela præsens Saphenæ sectio.

Ergo Apoplexiæ Prægnantium Saphenæ sectio.

DOMINI DOCTORES DISPUTATURI.

| | | |
|--|---|--|
| <i>M. Gabriel-Antonijs Jacques.</i> | <i>M. Claudius Brunet, Rei herbariæ Professor designatus.</i> | <i>M. Andreas De Laleu.</i> |
| <i>M. Claudius de la Vigne de Frecheville, Medicus Regis & Domûs Regiæ ordinarius.</i> | <i>M. Ludovicus de Samcul.</i> | <i>M. Petrus-Antonijs Lepy.</i> |
| <i>M. Joannes-Damianus Chevalier, Pharmacis Professor.</i> | <i>M. Emmanuel-Mauritius Duvernoy.</i> | <i>M. Elias Col de Vilars, Regis Consiliarius & in ejus Castellæ Medicus ordinarius.</i> |

Proponebat Parisiis JOANNES ISOARD, Reius apud Gallo-Provinciales, Baccalaureus Medicus, A. R. S. H.
1736. à sextâ ad meridiem.